

6-§. Chiziqli funksionallar

Bu paragraf chiziqli funksionallar, ularning ayrim xossalriga bag'ishlangan.

6.1-ta'rif. L chiziqli fazoda aniqlangan f sonli funksiya funksional deb ataladi. Agar barcha $x, y \in L$ lar uchun

$$f(x+y) = f(x) + f(y)$$

bo'lsa, f additiv funksional deyiladi.

6.2-ta'rif. Agar barcha $x \in L$ va barcha $\alpha \in C$ lar uchun

$$f(\alpha x) = \alpha f(x),$$

bo'lsa, f bir jinsli funksional deyiladi. Agar barcha $x \in L$ va barcha $\alpha \in C$ sonlar uchun

$$f(\alpha x) = \bar{\alpha} f(x)$$

bo'lsa, u holda kompleks chiziqli fazoda aniqlangan f funksional qo'shma bir jinsli deyiladi, bu yerda $\bar{\alpha}$ soni α ga qo'shma kompleks son.

6.3-ta'rif. Additiv va bir jinsli funksional chiziqli funksional deyiladi. Additiv va qo'shma bir jinsli funksional qo'shma chiziqli (yoki antichiziqli) funksional deyiladi.

Chiziqli funksionallarga misollar keltiramiz.

6.1-misol. $R^n \equiv \{x = (x_1, x_2, \dots, x_n), x_i \in R\}$ - n o'lchamli vektor fazo va $a = (a_1, a_2, \dots, a_n) \in R^n$ belgilangan element bo'lsin. U holda

$$f : R^n \rightarrow R, f(x) = \sum_{i=1}^n a_i x_i$$

moslik R^n da chiziqli funksional bo'ladi.

$$u(z) = \sum_{k=1}^n a_k \bar{z}_k$$

tenglik bilan aniqlanuvchi $u : C^n \rightarrow C$ akslantirish qo'shma chiziqli funksionalni aniqlaydi.

6.2. Quyidagi I va $I^* : C[a, b] \rightarrow C$ funksionallar

$$I(x) = \int_a^b x(t) dt, \quad I^*(x) = \int_a^b \overline{x(t)} dt$$

$C[a, b]$ fazodagi chiziqli va qo'shma chiziqli funksionallarga misol bo'ladi.

6.3. $y_0 \in C[a, b]$ berilgan element bo'lsin. Har bir $x \in C[a, b]$ funksiyaga

$$F(x) = \int_a^b x(t) y_0(t) dt$$

sonni mos qo'yamiz. Bu funksionalning chiziqliligi integrallash amalining asosiy xossaligidan kelib chiqadi.

$$F^*(x) = \int_a^b \overline{x(t)} y_0(t) dt$$

funksional $C[a, b]$ fazoda qo'shma chiziqli funksional bo'ladi.

6.4. C_2 fazoda chiziqli funksionalga misol keltiramiz. k - belgilangan natural son bo'lsin. C_2 dagi har bir $x = (x_1, x_2, \dots, x_k, \dots)$ uchun

$$f_k(x) = x_k$$

deymiz. Bu funksionalning chiziqliligi ko'rinib turibdi.

6.1. Chiziqli funksionalning geometrik ma'nosi

Bizga L chiziqli fazoda aniqlangan, nolmas f chiziqli funksional berilgan bo'lsin. Bu f funksional uchun $f(x) = 0$ shartni qanoatlantiruvchi barcha $x \in L$ nuqtalar to'plami uning yadrosi deyiladi va $\text{Ker } f = \{x \in L: f(x) = 0\}$ ko'rinishda belgilanadi. $\text{Ker } f$ to'plam L ning qism fazosi bo'ladi. Haqiqatan ham, agar $x, y \in \text{Ker } f$ bo'lsa, u holda ixtiyoriy a, b sonlar uchun

$$f(ax + by) = af(x) + bf(y) = 0$$

tenglik o'rinli.

$\text{Ker } f$ qism fazoning koo'lchami birga teng. Haqiqatan ham, $\text{Ker } f$ ga qarashli bo'lmagan, ya'ni $f(x_0) \neq 0$ bo'ladigan qandaydir x_0 elementni olamiz. Bunday element mavjud, chunki $f(x) \neq 0$ (aynan nolga teng emas). Umumiylikni

chegaralamasdan hisoblashimiz mumkinki, $f(x_0) = 1$ (aks holda biz $x_0 / f(x_0)$ ni olgan bo'lar edik, chunki $f(x_0 / f(x_0)) = 1$). Ixtiyoriy x element uchun $y = x - x_0 \cdot f(x)$ desak, u holda

$$f(y) = f(x - x_0 \cdot f(x)) = 0,$$

ya'ni $y \in \text{Ker } f$. Qaralayotgan x element $x = ax_0 + y$, $y \in \text{Ker } f$ ko'rinishda tasvirlanadi va bu tasvir yagonadir. Haqiqatan ham,

$$x = ax_0 + y, \quad y \in \text{Ker } f \quad \text{va} \quad x = a'x_0 + y', \quad y' \in \text{Ker } f$$

bo'lsin. U holda

$$(a - a')x_0 = y' - y$$

tenglik o'rinli. Agar $a = a'$ bo'lsa, $y = y'$ ekanligi ko'rinib turibdi. Agar $a - a' \neq 0$ bo'lsa, u holda

$$x_0 = \frac{y' - y}{a - a'} \in \text{Ker } f$$

ekanligi kelib chiqadi. Bu esa $x_0 \notin \text{Ker } f$ shartga zid. Bu qarama-qarshilik tasdiqni isbotlaydi.

Bu yerdan kelib chiqadiki, ikkita x_1 va x_2 elementlar $\text{Ker } f$ qism fazo bo'yicha bitta qo'shni sinfda yotishi uchun $f(x_1) = f(x_2)$ shartning bajarilishi zarur va yetarli. Haqiqatan ham,

$$x_1 = f(x_1)x_0 + y_1, \quad y_1 \in \text{Ker } f, \quad x_2 = f(x_2)x_0 + y_2, \quad y_2 \in \text{Ker } f$$

tenglikdan

$$x_1 - x_2 = (f(x_1) - f(x_2))x_0 + (y_1 - y_2)$$

tenglik kelib chiqadi. Bu yerdan ko'rinib turibdiki, $x_1 - x_2 \in \text{Ker } f$ bo'lishi uchun $f(x_1) - f(x_2) = 0$ bo'lishi zarur va yetarli.

$\text{Ker } f$ qism fazo bo'yicha har qanday ξ sinf o'zining ixtiyoriy vakili bilan bir qiymatli aniqlanadi. Bunday vakil sifatida ax_0 ko'rinishdagi elementni olish mumkin. Bu yerdan ko'rinadiki, $L / \text{Ker } f$ qism fazoning o'lchami birga teng ekan, ya'ni $\text{Ker } f$ ning koo'lchami birga teng.

Chiziqli funksionalning yadrosi $\text{Ker } f$ o'zida nolga aylanadigan funksionalni o'zgaras ko'paytuvchi aniqligida bir qiymatli aniqlaydi.

Haqiqatan ham, f va g funksionallar yadrolari teng bo'lsin, ya'ni $\text{Ker } f = \text{Ker } g$. U holda f uchun $x_0 \in L$ elementni shunday tanlaymizki, $f(x_0) = 1$ bo'lsin. Ko'rsatamizki, $g(x_0) \neq 0$. Ixtiyoriy $x \in L$ uchun

$$x = f(x)x_0 + y, \quad y \in \text{Ker } f \quad \text{va} \quad g(x) = f(x)g(x_0) + g(y) = f(x)g(x_0)$$

tengliklarga egamiz. Agar $g(x_0) = 0$ bo'lsa, $g(x) \equiv 0$ bo'lar edi. $g(x) = g(x_0)f(x)$ tenglikdan f va g funksionallarning proporsional ekanligi kelib chiqadi.

Koo'lchami birga teng bo'lgan ixtiyoriy L' qism fazo berilgan bo'lsin. U holda shunday f chiziqli funksional mavjudki, $\text{Ker } f = L'$ bo'ladi. Buning uchun L' qism fazoda yotmaydigan ixtiyoriy $x_0 \in L$ elementni olamiz va ixtiyoriy $x \in L$ elementni $x = ax_0 + y$, $y \in L'$ ko'rinishda yozamiz. Bunday yoyilma yagona. $f(x) = a$ tenglik yordamida aniqlanuvchi chiziqli funksionalning yadrosi $\text{Ker } f = L'$ bo'ladi.

L chiziqli fazoda koo'lchami birga teng bo'lgan qandaydir L' qism fazo berilgan bo'lsin. U holda L fazoning L' qism fazo bo'yicha har qanday qo'shni sinfi L' qism fazoga parallel bo'lgan gipertekislik deyiladi (xususan, L' qism fazoning o'zi θ elementni saqllovchi, ya'ni «koordinata boshidan o'tuvchi» gipertekislik hisoblanadi). Boshqacha aytganda, L' qism fazoga parallel bo'lgan M' gipertekislik - bu L' qism fazoni qandaydir $x_0 \in L$ vektorga parallel ko'chirishdan paydo bo'ladigan to'plam, ya'ni

$$M' = L' + x_0 = \{y : y = x + x_0, \quad x \in L'\}.$$

Ko'rinib turibdiki, agar $x_0 \in L'$ bo'lsa, $M' = L'$ bo'ladi, agarda $x_0 \notin L'$ bo'lsa, u holda $M' \neq L'$.

Agar f - L chiziqli fazoda aniqlangan chiziqli funksional bo'lsa, $M_f = \{x \in L : f(x) = 1\}$ to'plam $\text{Ker } f$ qism fazoga parallel gipertekislik bo'ladi.

Haqiqatan ham, $f(x_0)=1$ bo'ladigan x_0 elementni tanlab, ixtiyoriy elementni $x = \alpha x_0 + y, \quad y \in \text{Ker } f$ ko'rinishda yozishimiz mumkin.

Ikkinchi tomondan, agar M' - koo'lchami birga teng bo'lgan L' qism fazoga parallel va koordinata boshidan o'tmaydigan gipertekislik bo'lsa, u holda shunday yagona f chiziqli funksional mavjudki,

$$M' = \{x : f(x) = 1\}$$

bo'ladi. Haqiqatan ham, $M' = L' + x_0, \quad x_0 \in L$ bo'lsin. U holda har qanday $x \in L$ element yagona ravishda $x = a x_0 + y, \quad y \in L'$ ko'rinishda tasvirlanadi. $f(x) = a$ tenglik yordamida aniqlanadigan chiziqli funksional izlanayotgan funksional bo'ladi. Uning yagonaligi quyidagidan kelib chiqadi:

Agar $x \in M'$ da $g(x) = 1$ bo'lsa, u holda $y \in L'$ da $g(y) = 0$ bo'ladi. Bundan

$$g(ax_0 + y) = a = f(ax_0 + y)$$

tenglik kelib chiqadi.

Shunday qilib, L chiziqli fazoda aniqlangan noldan farqli barcha chiziqli funksionallar bilan koordinata boshidan o'tmaydigan L dagi barcha gipertekisliklar o'rtasida o'zaro bir qiymatli moslik o'rnatildi.

7-§. Qavariq to'plamlar va qavariq funksionallar

L - haqiqiy chiziqli fazo, x va y uning ikki nuqtasi bo'lsin. U holda

$$\alpha x + \beta y, \quad \alpha, \beta \in [0,1], \quad \alpha + \beta = 1$$

shartni qanoatlantiruvchi barcha elementlar to'plami x va y nuqtalarni tutashtiruvchi kesma deyiladi va u $[x, y]$ bilan belgilanadi, ya'ni

$$[x, y] = \{\alpha x + \beta y : \quad \alpha, \beta \in [0,1], \quad \alpha + \beta = 1\}.$$

7.1-ta'rif. Agar $M \subset L$ to'plam o'zining ixtiyoriy $x, y \in M$ nuqtalarini tutashtiruvchi $[x, y]$ kesmani ham o'zida saqlasa, M ga qavariq to'plam deyiladi.

7.2-ta'rif. Agar biror $x \in E$ nuqta va ixtiyoriy $y \in L$ uchun shunday $\varepsilon = \varepsilon(y) > 0$ son mavjud bo'lib, barcha $t, |t| < \varepsilon$ larda $x + ty \in E$ munosabat bajarilsa, $x \in E$ nuqta $E \subset L$ to'plamning yadrosiga qarashli deyiladi. $E \subset L$ to'plamning yadrosi - $J(E)$ bilan belgilanadi, ya'ni

$$J(E) = \{x \in E : \forall y \in L, \exists \varepsilon = \varepsilon(y) > 0, \forall t \in R, |t| < \varepsilon, x + ty \in E\}.$$

7.3-ta'rif. Yadrosi bo'sh bo'lmagan qavariq to'plam qavariq jism deyiladi.

7.1-misol. R^3 fazoda kub, shar, tetrayedr, tekislikda to'g'ri to'rtburchak, doira, uchburchak qavariq jism bo'ladi. C_2 fazodagi

$$B[0,1] = \left\{ x \in C_2 : \sum_{n=1}^{\infty} |x_n|^2 \leq 1 \right\}$$

birlik shar qavariq jism bo'ladi.

7.2. R^2 da to'g'ri chiziq (kesma) qavariq to'plam bo'ladi, lekin qavariq jism bo'lmaydi. Chunki, uning yadrosi bo'sh to'plam (mustaqil isbotlang).

Agar M qavariq to'plam bo'lsa, u holda uning yadrosi $J(M)$ ham qavariq to'plamdir. Haqiqatan ham,

$$x, y \in J(M) \quad \text{va} \quad z = \alpha x + \beta y, \quad \alpha, \beta \geq 0, \quad \alpha + \beta = 1$$

bo'lsin. U holda ixtiyoriy $a \in L$ uchun shunday $\varepsilon_1 > 0, \varepsilon_2 > 0$ sonlar mavjudki, $|t_1| < \varepsilon_1, |t_2| < \varepsilon_2$ shartni qanoatlantiruvchi barcha t_1, t_2 larda $x + t_1 a$ va $y + t_2 a$ elementlar M to'plamda yotadi. Bundan kelib chiqadiki, barcha $|t| < \varepsilon$, $\varepsilon = \min(\varepsilon_1, \varepsilon_2)$ larda

$$\alpha(x + t a) + \beta(y + t a) = \alpha x + \beta y + \alpha t a + \beta t a = z + t a \in M, \quad \text{ya'ni} \quad z \in J(M).$$

7.1-teorema. Istalgan sondagi qavariq to'plamlarning kesishmasi yana qavariq to'plamdir.

Isbot. Faraz qilaylik,

$$M = \bigcap_{\alpha} M_{\alpha}$$

bo'lib, barcha M_{α} lar qavariq to'plamlar bo'lsin, x va y lar M ning ikki ixtiyoriy nuqtasi bo'lsin. U holda x va y nuqtalarni tutashtiruvchi $[x, y]$ kesma M_{α} larning

har biriga qarashli va demak, M ga ham qarashli. Shunday qilib, M haqiqatan ham qavariq to'plam ekan. Δ

Shuni eslatib o'tamizki, qavariq jismlarning kesishmasi yana qavariq jism bo'lavermaydi. Bunga quyidagi misolda ishonch hosil qilish mumkin.

7.3. Tekislikdagi $P = \{(x, y): 0 \leq x \leq 1, 0 \leq y \leq 1\}$ va

$Q = \{(x, y): 0 \leq x \leq 1, 1 \leq y \leq 2\}$ qavariq jismlarning kesishmasi

$$P \cap Q = \{(x, y): 0 \leq x \leq 1, y = 1\}$$

kesmadan iborat bo'lib, u qavariq jism emas (7.2-misolga qarang).

Qavariq to'plam tushunchasi qavariq funksional tushunchasi bilan uzviy bog'liq.

7.4-ta'rif. Agar L haqiqiy chiziqli fazoda aniqlangan manfiy p funksional

$$1) p(x + y) \leq p(x) + p(y), \quad \forall x, y \in L,$$

$$2) p(ax) = a p(x), \quad \forall a \geq 0 \text{ va } \forall x \in L$$

shartlarni qanoatlantirsa, p ga qavariq funksional deyiladi.

Biz bu yerda $p(x)$ miqdorni chekli deb faraz qilmaymiz, ya'ni ayrim $x \in L$ lar uchun $p(x) = \infty$ ham bo'lishi mumkin. Agar barcha $x \in L$ lar uchun $p(x)$ chekli bo'lsa, p chekli funksional deyiladi.

7.4-misol. $p: C[a, b] \rightarrow R$ va

$$p(x) = \int_a^b |x(t)| dt$$

akslantirishning chekli qavariq funksional ekanligini isbotlang.

Isbot. Integralning monotonlik xossasidan, ixtiyoriy $x \in C[a, b]$ uchun $p(x) \geq 0$ ekanligi kelib chiqadi. Endi bizga $C[a, b]$ fazoning ixtiyoriy x va y elementlari berilgan bo'lsin. U holda

$$p(x + y) = \int_a^b |x(t) + y(t)| dt \leq \int_a^b |x(t)| dt + \int_a^b |y(t)| dt = p(x) + p(y)$$

tengsizlik o'rinli. Xuddi shunday ixtiyoriy x va $\alpha \geq 0$ uchun

$$p(\alpha x) = \int_a^b |\alpha x(t)| dt = \alpha \int_a^b |x(t)| dt = \alpha p(x)$$

tenglik o'rinli. Demak, p qavariq funksional ekan. Uning chekli qavariq funksional ekanligi $p(x) \leq (b-a) \max |x(t)| < \infty$ tengsizlikdan kelib chiqadi. Δ

7.5. $q: C[0, 1] \rightarrow R$ va

$$q(x) = V_0^1[x]$$

akslantirish chekli bo'lmagan qavariq funksional bo'lishini isbotlang.

Isbot. q funksionalning manfiymasligi va qavariq funksional ta'rifidagi 1-2 shartlarning bajarilishi funksiya to'la o'zgarishi xossalaridan kelib chiqadi. Haqiqiy o'zgaruvchining funksiyalari nazariyasi fanidan ma'lumki, $C[0, 1]$ fazoning $x_0(t) = t \sin(1/t)$ elementi uchun $V_0^1[x_0] = +\infty$ tenglik o'rinli. Demak, q chekli bo'lmagan qavariq funksional ekan. Δ

Endi qavariq to'plamlar bilan qavariq funksionallar orasidagi bog'lanishni qaraymiz.

7.2-teorema. Agar $p: L \rightarrow R_+$ qavariq funksional va $k > 0$ bo'lsa, u holda

$$E = \{x \in L: p(x) \leq k\}$$

qavariq to'plam bo'ladi. Agar p funksional chekli bo'lsa, u holda E to'plam yadrosi nol elementni saqlaydigan,

$$J(E) = \{x \in L: p(x) < k\}$$

yadroli qavariq jism bo'ladi.

Isbot. Agar $x, y \in E$ va $\alpha + \beta = 1$, $\alpha, \beta \geq 0$ bo'lsa, u holda

$$p(\alpha x + \beta y) \leq p(\alpha x) + p(\beta y) = \alpha p(x) + \beta p(y) < k\alpha + k\beta = k,$$

ya'ni E - qavariq to'plam. Endi p chekli funksional, $p(x) < k$, $t > 0$ va $y \in L$ bo'lsin. U holda

$$p(x \pm t y) \leq p(x) + t p(\pm y)$$

Agar $p(-y) = p(y) = 0$ bo'lsa, u holda ixtiyoriy t uchun $x \pm t y \in E$ bo'ladi. Agar $p(-y)$, $p(y)$ sonlardan hech bo'lmaganda birortasi noldan farqli bo'lsa, u holda

$$t < \frac{k - p(x)}{\max(p(y), p(-y))}$$

shartda $x \pm ty \in E$ bo'ladi. Qavariq funksionalning θ nuqtadagi qiymati nolga teng bo'lgani uchun $\theta \in J(E)$. Δ

Endi $k = 1$ holni qaraymiz. U holda har qanday chekli p qavariq funksional L da $\theta \in J(E)$ bo'ladigan yagona $E = \{x \in L : p(x) \leq 1\}$ qavariq jismni aniqlaydi. Aksincha, E - yadrosi nol elementni saqlaydigan qavariq jism bo'lsin. U holda har bir $x \in L$ ga

$$p_E(x) = \inf \left\{ r > 0 : \frac{x}{r} \in E \right\}$$

sonni mos qo'yuvchi akslantirish qavariq funksional bo'ladi (mustaqil isbotlang). Bu funksional E qavariq jism uchun *Minkovskiy funksionali* deyiladi.

7.5-ta'rif. L - haqiqiy chiziqli fazo va L_0 - uning biror qism fazosi bo'lsin. L_0 qism fazoda f_0 chiziqli funksional va L fazoda f chiziqli funksional berilgan bo'lsin. Agar ixtiyoriy $x \in L_0$ uchun $f(x) = f_0(x)$ tenglik bajarilsa, f chiziqli funksional f_0 funksionalning L fazoga davomi deyiladi.

Funksionalning davomi bir qiymatli emas. Funksionalning ixtiyoriy davomi maqsadga muvofiq emas. Odatda funksionalni qandaydir shartni saqlab qolgan holda davom ettirish talab qilinadi.

7.3-teorema. (*Xan-Banax*). Aytaylik, p - L haqiqiy chiziqli fazoda aniqlangan qavariq funksional va L_0 - L ning qism fazosi bo'lsin. Agar L_0 da aniqlangan f_0 chiziqli funksional

$$f_0(x) \leq p(x), \quad x \in L_0 \tag{7.1}$$

shartni qanoatlantirsa, u holda f_0 ni L da aniqlangan va L da (7.1) shartni qanoatlantiruvchi f chiziqli funksionalgacha davom ettirish mumkin.

Isbot. $L_0 \neq L$ bo'lgan holda f_0 chiziqli funksionalni L_0 dan kengroq bo'lgan $L^{(1)}$ qism fazogacha (7.1) shartni saqlagan holda chiziqli davom ettirish mumkinligini ko'rsatamiz. L_0 ga qarashli bo'lmagan ixtiyoriy $z \in L$ elementni olamiz. $L^{(1)}$ bilan

L_0 va z elementlardan tashkil topgan qism fazoni belgilaymiz. $L^{(1)}$ quyidagicha ko‘rinishdagi elementlardan tashkil topgan

$$\{tz + x, \quad t \in R, \quad x \in L_0\} = L^{(1)}$$

Agar f_1 funksional f_0 ning $L^{(1)}$ qism fazogacha chiziqli davomi bo‘lsa, u holda

$$f_1(tz + x) = f_1(tz) + f_1(x) = t f_1(z) + f_0(x),$$

yoki $f_1(z) = c$ deb olsak,

$$f_1(tz + x) = tc + f_0(x)$$

tenglik o‘rinli bo‘ladi. Endi c ni shunday tanlaymizki, f_1 funksional (7.1) shartni qanoatlantirsin, ya’ni

$$f_1(tz + x) = tc + f_0(x) \leq p(tz + x) \quad (7.2)$$

tengsizlik bajarilsin. Agar $t > 0$ bo‘lsa, (7.2) shart quyidagi shartga teng kuchli:

$$c + f_0\left(\frac{x}{t}\right) \leq p\left(z + \frac{x}{t}\right) \quad \text{yoki} \quad c \leq p\left(z + \frac{x}{t}\right) - f_0\left(\frac{x}{t}\right),$$

$t < 0$ bo‘lsa,

$$c + f_0\left(\frac{x}{t}\right) \geq -p\left(-z - \frac{x}{t}\right) \quad \text{yoki} \quad c \geq -p\left(-z - \frac{x}{t}\right) - f_0\left(\frac{x}{t}\right).$$

Bu ikkala shartni qanoatlantiruvchi c son har doim mavjudligini ko‘rsatamiz. L_0 qism fazodan olingan ixtiyoriy y' va y'' elementlar uchun

$$-f_0(y'') + p(y'' + z) \geq -f_0(y') - p(-y' - z) \quad (7.3)$$

tengsizlik o‘rinli. Haqiqatan ham, bu tengsizlik quyidagi tengsizlikdan bevosita kelib chiqadi:

$$\begin{aligned} f_0(y'') - f_0(y') &= f_0(y'' - y') \leq p(y'' - y') = \\ &= p((y'' + z) + (-y' - z)) \leq p(y'' + z) + p(-y' - z). \end{aligned}$$

Endi

$$c'' = \inf_{y''} (-f_0(y'') + p(y'' + z)), \quad c' = \sup_{y'} (-f_0(y') - p(-y' - z))$$

deb olamiz. (7.3) tengsizlik ixtiyoriy y' va y'' lar uchun o'rinli bo'lganidan $c'' \geq c'$ ekanligi kelib chiqadi. Agar c sonini $c'' \geq c \geq c'$ qo'sh tengsizlikni qanoatlantiradigan qilib tanlasak, u holda

$$f_1(tz + x) = tc + f_0(x)$$

formula bilan aniqlangan f_1 funksional chiziqli va (7.1) shartni qanoatlantiradi.

Shunday qilib, biz f_0 funksionalni L_0 qism fazodan undan kengroq bo'lgan $L^{(1)}$ qism fazogacha (7.1) shartni saqlagan holda chiziqli davom ettirdik.

Agar L chiziqli fazoda sanoqlita $x_1, x_2, \dots, x_n, \dots$ elementlar sistemasi mavjud bo'lib, bu sistemani saqlovchi $L(\{x_k\})$ minimal qism fazo L ning o'ziga teng bo'lsa, u holda f_0 funksionalni

$$L^{(1)} = \{L_0, x_1\}, \quad L^{(2)} = \{L^{(1)}, x_2\}, \dots$$

kengayib boruvchi qism fazolarda yuqoridagidek aniqlab, f_0 funksionalni L fazogacha (7.1) shartni saqlagan holda davom ettirish mumkin.

Agar chiziqli qobig'i L ga teng bo'ladigan sanoqli sistema mavjud bo'lmasa, u holda teoremaning isboti Sorn lemmasi yordamida nihoyasiga etkaziladi ([1] ga qarang). Δ

7.6. $L = C[-1, 1]$ uzluksiz funksiyalar fazosi va uning qism fazosi $L_0 = \{x \in C[-1, 1]: x(t) \equiv 0, t \in [-1, 0]\}$ ni qaraymiz. L_0 qism fazoda f_0 chiziqli funksionalni quyidagicha aniqlaymiz:

$$f_0(x) = \int_{-1}^1 x(t) dt, \quad x \in L_0.$$

$L = C[-1, 1]$ chiziqli fazoda f va p funksionallarni esa quyidagicha aniqlaymiz:

$$f(x) = \int_{-1}^0 x(t) y_0(t) dt + \int_0^1 x(t) dt, \quad p(x) = 2 \max_{-1 \leq t \leq 1} |x(t)|, \quad x \in L$$

Quyidagicha savollar qo'yamiz.

- 1) f_0 funksional (7.1) tengsizlikni qanoatlantiradimi?
- 2) f funksional f_0 funksionalning L fazogacha davomi bo'ladimi?

3) $y_0 \in C[-1,0]$ qanday tanlanganda f funksional Xan-Banax teoremasining shartlarini qanoatlantiradi?

Yechish. f_0 funksional (7.1) tengsizlikni qanoatlantiradi. Haqiqatan ham,

$$f_0(x) = \int_{-1}^1 x(t) dt \leq \int_{-1}^1 \max_{-1 \leq t \leq 1} |x(t)| dt = 2 \max_{-1 \leq t \leq 1} |x(t)| = p(x), \quad x \in L_0.$$

Agar $x \in L_0$, bo'lsa u holda

$$\int_{-1}^0 x(t) y_0(t) dt = 0$$

bo'ladi. Shuning uchun, barcha $y_0 \in C[-1,0]$ larda $f(x) = f_0(x)$, $x \in L_0$ tenglik o'rinli. Demak, barcha y_0 lar uchun f funksional f_0 funksionalning L fazogacha davomi bo'ladi. Nihoyat,

$$f(x) \leq \max_{-1 \leq t \leq 0} |x(t)| \int_{-1}^0 |y_0(t)| dt + \int_0^1 \max_{0 \leq t \leq 1} |x(t)| dt \leq 2 \max_{-1 \leq t \leq 1} |x(t)| = p(x), \quad x \in L$$

tengsizlik,

$$\int_{-1}^0 |y_0(t)| dt = c \leq 1$$

shartni qanoatlantiruvchi barcha $y_0 \in C[-1,0]$ larda o'rinli. Demak, $c \in [0,1]$ bo'lsa, Xan-Banax teoremasining shartlari bajariladi. Shunday qilib f_0 funksionalni (7.1) shartni saqlagan holda cheksiz ko'p usul bilan L fazogacha davom ettirish mumkin ekan.

Endi Xan-Banax teoremasining kompleks variantini isbot qilamiz.

7.6-ta'rif. L - kompleks chiziqli fazo va unda aniqlangan manfiymas p funksional berilgan bo'lsin. Agar ixtiyoriy $x, y \in L$ va ixtiyoriy $\alpha \in C$ uchun

$$p(x+y) \leq p(x) + p(y) \quad \text{va} \quad p(\alpha x) = |\alpha| p(x)$$

shartlar bajarilsa, u holda p - qavariq funksional deyiladi.

7.4-teorema. (Xan-Banax). p - L kompleks chiziqli fazoda aniqlangan qavariq funksional, f_0 esa L_0 qism fazoda aniqlangan va bu qism fazoda

$$|f_0(x)| \leq p(x), \quad x \in L_0$$

shartni qanoatlantiruvchi chiziqli funksional bo'lsin. U holda butun L da aniqlangan va

$$f(x) = f_0(x), \quad \forall x \in L_0, \quad |f(x)| \leq p(x), \quad \forall x \in L$$

shartlarni qanoatlantiruvchi f chiziqli funksional mavjud.

Isbot. L va L_0 fazolarni haqiqiy chiziqli fazo sifatida qarab, mos ravishda L_R va L_{0R} bilan belgilaymiz. Tushunarliki, p funksional L_R da aniqlangan qavariq funksional bo'ladi, $f_{0R}(x) = \operatorname{Re} f_0(x)$ esa

$$|f_{0R}(x)| \leq p(x), \quad x \in L_{0R} (= L_0)$$

shartni, bundan esa $f_{0R}(x) \leq p(x)$ shartni qanoatlantiruvchi L_{0R} dagi haqiqiy chiziqli funksional bo'ladi. 7.3-teorema ko'ra, L_R da aniqlangan va

$$f_R(x) \leq p(x), \quad x \in L_R (= L),$$

$$f_R(x) = f_{0R}(x), \quad x \in L_{0R} (= L_0)$$

shartni qanoatlantiruvchi f_R chiziqli funksional mavjud. Tushunarliki,

$$-f_R(x) = f_R(-x) \leq p(-x) = p(x).$$

Demak,

$$|f_R(x)| \leq p(x), \quad x \in L_R (= L) \quad (7.4)$$

Endi f funksionalni L da quyidagicha aniqlaymiz

$$f(x) = f_R(x) - i f_R(ix).$$

Murakkab bo'lmagan hisoblashlar yordamida ko'rsatish mumkinki, f - L kompleks chiziqli fazoda aniqlangan chiziqli funksional bo'ladi hamda

$$f(x) = f_0(x), \quad \forall x \in L_0, \quad \operatorname{Re} f(x) = f_R(x), \quad \forall x \in L.$$

Ixtiyoriy $x \in L$ uchun $|f(x)| \leq p(x)$ ekanligini ko'rsatsak, teorema isbot bo'ladi.

Teskaridan faraz qilamiz. Biror $x_0 \in L$ uchun $|f(x_0)| > p(x_0)$ bo'lsin. $f(x_0)$

kompleks sonni $f(x_0) = \rho e^{i\varphi}$, $\rho > 0$ ko'rinishda yozamiz va $y_0 = e^{-i\varphi} x_0$ deb olamiz. U holda

$$f_R(y_0) = \operatorname{Re} f(y_0) = \operatorname{Re} [e^{-i\varphi} f(x_0)] = \rho > p(x_0) = p(y_0).$$

Bu esa (7.4) shartga zid. Δ